

Tabell 3-fk

Anslag på frie inntekter i 2019 for fylkeskommunane

Tabell 3 viser anslag på vekst i frie inntekter for fylkeskommunane frå 2018 til 2019. Som frie inntekter reknar ein inntektsskatt (inkl. naturressursskatt) og rammetilskot. Tabellen viser veksten etter anslag på rekneskap for 2018. Alle tala er i nominelle kroner. Prisveksten i kommunesektoren frå 2018 til 2019 er anslått til 2,8 pst.

I skatteanslaget er anslag på skatteutjamning inkludert. Skatteinntektene, inkl. skatteutjamning, er den storleiken det er knytt mest uvisse til når ein bereknar veksten i frie inntekter. Samla inntektsskatt for fylkeskommunane i 2018 og 2019 blir anslått av Finansdepartementet i statsbudsjettet for 2019. For å anslå skatteinntektene for kvar fylkeskommune tek ein utgangspunkt i skatt per innbyggjar i fylkeskommunen i 2017 og skriv fram talet med innbyggjartalet i 2018. Ut ifrå skatt i 2017 framskriven med innbyggjartal for 2018, blir det rekna ut kva del som kvar fylkeskommune får av berekna samla skatt. Den delen blir nytta til å fordele samla skatteanslag mellom fylkeskommunane både for 2018 og 2019. Dette trekkjer i retning av at fylkeskommunar som har høgare vekst i talet på innbyggjarar enn landsgjennomsnittet frå 2018 til 2019, og får høgare vekst i skatteinntekta enn det som fylgjer av føresetnadene for berekninga. Det motsette vil kunne vere tilfellet for fylkeskommunar med svakare vekst i talet på innbyggjarar enn gjennomsnittet for landet. Skatteutjamninga for 2019 tek også utgangspunkt i innbyggjartalet per 1. januar 2019.

I berekninga av veksten i frie inntekter blir naturressursskatten halden på same nivå i 2018 og 2019. Det blir nytta tal frå inntektsåret 2016.

Rammetilskot 2018 er henta frå revidert nasjonalbudsjett 2018. Rammetilskotet for 2019 er vist i tabell 1-fk.

For å gjere tala samanliknbare, noko som er ein føresetnad for å kunne berekne veksten, blir frie inntekter for 2018 korrigererte for oppgåveendringar, regelendringar og innlemmingar av øyremerkte tilskot i 2019. I 2018 er summen av desse endringane 30,1 mill. kroner. Korreksjonar for 2018 for å kunne samanlikne med 2019 er viste i innleiinga til Grønt hefte. Dei fleste oppgåvekorrigeringane er gjort på fylkeskommunenivå.

Veksten i frie inntekter frå 2018 til 2019 blir berekna frå anslag på rekneskap for 2018 i Prop. 1 S for 2019. Skatteinntektene for fylkeskommunane i 2019 er anslått til 33,99 mrd. kroner. Inntektsveksten frå 2018 til 2019, ut frå anslag på rekneskap, er nominelt anslått til 2,3 pst. Anslaget omfattar ei oppjustering av skatteanslaget for 2018 med 300 mill. kroner samanlikna med anslaget i Revidert nasjonalbudsjett 2018.

Skjønstilskot som blir fordelt i løpet av året i 2018 og 2019 er ikkje inkluderte i vekstberekninga for kvar fylkeskommune. Ufordelt skjøn består i 2018 av 18,9 mill. kroner som er sett av til uventa hendingar (reservepott). I 2019 utgjer reservepotten 50 mill. kroner.

Området Rindal kommune flyttast frå Møre og Romsdal fylkeskommune til Trøndelag fylkeskommune 1. januar 2019. Det er teke omsyn til dette ved berekning av anslag på frie inntekter i 2018 og anslag på oppgåvekorrigerede frie inntekter i 2018 og såleis og veksten i oppgåvekorrigerede frie frå 2018 til 2019.

Kolonne 1 – Anslag på frie inntekter i 2018

Kolonne 1 viser frie inntekter etter anslag på rekneskap for 2018. Skatteinntektene til fylkeskommunane er framskrivne i samsvar med skatteanslaget for 2018 i Prop. 1 S (2017–2018), med ein lik vekst for alle fylkeskommunane.

Kolonne 2 – Anslag på oppgåvekorrigerede frie inntekter i 2018

Inntektene i kolonne 2 er anslag på rekneskap korrigerert for oppgåveendringar, regelendringar og innlemming av øyremerkte tilskot. Det er teke utgangspunkt i det same anslaget som i kolonne 1. Oppgåveendringane er omtalte nærare i innleiingsteksten til Grønt hefte og Prop. 1 S (2018–2019) for Kommunal- og moderniseringsdepartementet.

Kolonne 3 – Anslag på frie inntekter i 2019

Kolonne 3 viser anslag på frie inntekter i 2019. Rammetilskotet til fylkeskommunane, eksklusive skatteutjamninga, er henta frå kolonne 4 i tabell 1-fk. Ved berekninga av anslag på skatteinntektene til fylkeskommunane har departementet teke utgangspunkt i fylkeskommunane sine skatteinntekter i 2017. Desse er framskrivne i samsvar med innbyggjartal per 1.1.2018 og skatteanslaget for 2018 og 2019 i nasjonalbudsjettet for 2019. Skatteanslaget for den einkilde fylkeskommune er deretter lagt til grunn for berekninga av skatteutjamninga.

Kolonne 4 – Anslag på korrigerert vekst frå 2018 til 2019

Kolonne 4 viser anslag på oppgåvekorrigerert vekst i frie inntekter frå anslag på rekneskap 2018 til 2019 for den einkilde fylkeskommune (kolonne 3 – kolonne 2).

Kolonne 5 – Anslag på korrigerert vekst i pst. frå 2018 til 2019

Kolonne 5 viser prosentvis oppgåvekorrigerert vekst frå anslag rekneskap 2018 til 2019.